

ՎԱՀԵ ԵՐԿԱՆՅԱՆ, Հայկական մշակույթը 1800—1917 թթ., ՀՍՍՀ ԳԱ հրատարակչություն, Երևան, 1982, 271 էջ:

Հեղինակն անձանոթ չէ ընթերցողին. Վահե Երկանյանն արգեն հայտնի է հայ դպրոցին նվիրված իր մենագրությամբ («Պայքար հայկական նոր դպրոցի համար Անդրկովկասում. 1870—1905»), առավելագույնս «Հայ ժողովրդի պատմություն» ակադեմիական բազմահատոր Զրատարակության VI հատորում տեղ գտած իր ակնարկներով՝ նվիրված հայ մշակույթի պատմության առանձին հատվածներին:

Դրանք բավարար հիմք են, որպեսզի նա բարոյական իրավունքով ձեռք զարկեր հայ մշակույթի պատմության առավել ընդարձակ հատվածի տարեգրությունը լիամիտի ներկայացնելուն Սակայն թեման ունի իր յուրահատուկ դժվարությունը. գրեթե առաջին անգամ է փորձ արվում մեկտեղելու հայ մշակույթի պատմությունը՝ նրա անհամեմատ ճեղք ժամանակամիջոցում՝ XIX դ. և մեր դարաշրջանի առաջին քսանամյակում՝ նրա համարյա բոլոր դրսևորումներով: Նյութի բազմակողմայնությունը, փաստերի ցանուցի լինելը, առհասարակ հայ պատմության երկատվածությունը հետազոտողի վրա կանխապես մեծ պարտք են դնում: Անհրաժեշտ այդ պարտքը Վահե Երկանյանը ստանձնել է համարձակությամբ ու պատռուխանատվությամբ: Ընթերցողին ներկայացրած աշխատանքը, որ հրատարակվել է գիտահանրամատչելի մատենաշարով, ոչ մեծ՝ շուրջ տասնմեկ հեղինակային մամուլ ծավալով, ցույց է տալիս, որ նա հաղթահարել է թեման՝ բազմերանգ փաստերը մեկտեղելու, սխտեմավորելու, աշխատանքի սահմանները ներելու լայի բնութագրելու իմաստով: Գործը մենագրական բնույթ չի կրում. այն չի կարելի համարել նաև ուսումնասիրություն: Երկանյանի աշխատանքը խստորոշ կանոններում ամփոփվող հանրագիտական սկզբունքների ենթարկված խտացումն է այն ուղու, որ անցել է հայ մշակույթի նոր դարաշրջանում՝ նորագույնի պատվանդանին կանգնելու համար:

Եթե այսօրվա մակարդակից պատմաբանի մի հետադարձ հայացք ձգենք հայ մշակույթի բազմադարյան տարեգրության վրա, ապա ակնառու կդառնա, որ 1800—1920 թթ. հարյուր քսան տարվա ժամանակամիջոցը հայ մշակույթի համար լինելության ու երկունքի դարահատված էր՝ ձեռքբերումների և կորստի, արարման և վթարների, բարձունքների և անբերրության, մտքի ու հոգու բացառիկ պոռթկումների և հարկադիր դադարների ու ակամա արգելակումների պրկված մի շղթա, որ իրար հետ ամրակապում է հնագույն—հիներ՝ այսօրվա—նորագույնի հետ: Ֆրանսիական հայտնի գործչի խոսքերը ժառանգելով, հայ մի հրապարակախոս հարյուր տարի առաջ մեր ժողովրդի անունից իրեկ նշանաբան հռչակել է. «Ես աշխատում եմ, ես տանջվում եմ, ուրեմն ես գոյություն ունեմ»: Վ. Երկանյանի գիրքը իր ընդհանուր նպատակամղածությամբ հաստատում է հայ ժողովրդի դարավոր խորհրդանիշը, որ տվյալ դեպքում կարելի է քանաձեռնել այսպես. «Ես ստեղծում եմ, ուրեմն ե կամ, գոյատևում եմ»: Եվ դա երևում է գրախոսվող աշխատանքի ամեն մի հատվածից, իրար շաղկապվող փաստերով ու թվարկումներով, համառոտ, բայց և դիպուկ բնութագրումներով: Հազարավոր փաստերի հանրագումար է գիրքը: Հենց միայն այդ հեղինակից պահանջել է երկարատև տքնանք: Առաջին անգամ Վ. Երկանյանի գրքի շնորհիվ ընթերցողը հնարավորություն է ստանում մատչելի ձևով ու բարեխիղճ մեկտեղումով ընդհանուր գաղափար կազմելու քննվող դարաշրջանի հայ մշակութային կենտրոնների ու օջախների, լուսավորության և գրատպության ու մամուլի, գիտության, գրականության ու արվեստի դժվարին ընթացքի, դրսևորումների ու ամրապինդ հիմքի վրա զարգանալու մասին: Փաստական առումով զբոսնում հազիվ թե կարելի է արձանագրել որևէ լուրջ վրիպում կամ բացթողում: Եվ դա հավասարապես վերաբերում է մշակույթի բոլոր բնագավառներին՝ կրթության—դպրոց, տպագրական գործ—մամուլ, լեզվաբանություն—պատմագիտություն, հնագիտություն—ազգագրություն, գրականագիտություն—փիլիսոփայություն, գրական (նաև աշուղական) ստեղծագործություն—գրողներ, հայագիտություն—գիտնական հայագետներ, թատրոն—երաժշտություն և կերպարվեստ՝ 1800-ից առ 1917-ը:

Ընդհանուր դադափար տալու խնդիրը գրքում միաժամանակ զուգորդվել է ժողովրդի ստեղծագործող մտքի, այսպես ասած, անհատական դրսևորումները նշելու, հաճախ և արժեքավորելու խնդրի հետ, որպես կանոն, Վ. Երկանյանը նշում է տվյալ հեղինակի ու զործի ծննդյան ու մահվան թվականները, գործունեության շառավիղը, հիմնական ստեղծագործությունն ու ծառայությունը՝ անհրաժեշտ տեղեկություններ, որ հազիվ թե կարելի է մեկտեղված գտնել մի որևէ այլ աշխատանքում: Ընդ որում հաշվառվում է կատարված գրքի նկարագրողումը (55 նկար): Մյուս կողմից, հեղինակը ձգտել է ամեն մի առանձին դեպքում տալ տվյալ մշակութային գործի ստեղծագործական դիմագծով՝ նշելով նրա հիմնական գործը, հպանցիկ բնութագրել նրա լուսման հայ մշակույթի շտեմարան, երբեմն նաև գործունեության ու ստեղծագործական գաղափարական—ոճական ուղղությունը: Ինչպես այս, այնպես էլ զուտ փաստական առումով հեղինակն անհրաժեշտաբար դիմել է շատ աղբյուրների և ուսումնասիրությունների: Մոտ ութ հարյուր անձնանունների ցանկը (ցավոք, տեղանունների ցանկ չի տրված, որ նման ընդգրկման աշխատանքի համար անհրաժեշտություն է) օգնում է ընթերցողին՝ վերագառնալու այս կամ այն հեղինակին ու գործին նվիրված տողերին:

Հեղինակի կատարած աշխատանքի ծավալի մասին գաղափար տալու համար թերթներ գրքի առաջին ընդարձակ հատվածներից մեկը, որ կրում է «Լուսավորություն» խորագիրը (էջ 21—65): Կյանքի վերափոխման համար մղված պայքարն իրավացիորեն պայմանավորելով հասարակական—քաղաքական պայմաններով, հեղինակն առաջին պլանի վրա է դրել կրթական—լուսավորական այն երկունքը, որ հիմք է հանդիսացել թե՛ մշակույթի և թե՛ առհասարակ կյանքի առաջընթացի համար: Խնդիրը, ինչպես ցույց է տալիս հեղինակը, միայն դպրոցների հիմնումը չէր, այլ նաև նոր կրթական—լուսավորական սկզբունքների ներառումն ու արմատավորումը, տարածումն ու զարգացումը՝ միշտ և ամենուր ուշադրության կենտրոնում պահելով այդ գործի աղգային դիմագծի անխառն պահպանումը:

Աշխարհաբարի լինելության ընթացքը, լեզվապայքարը, ժողովրդին հասկանալի և դրական համագաղթին լեզվի մշակումը ցույց տալով, հեղինակը շեշտում է նաև այն հսկայական դերը, որ ունեցավ դրական լեզուն ժողովրդի լայն զանգվածների կրթության ու լուսավորության գործում: Առանձին մշակութային գործիչների նշելուց բացի, Վ. Երկանյանը շեշտում է նաև կրթական րազմաթիվ օջախների դերը՝ Մայր Վարժարան, ներսիսյան վարժարան, Սկյուտարի ճեմարան, մի շարք դպրոցներ, Լազարյան ուսումնական հաստատություն, Ներսիսյան արդյունաշատ դպրոց և այլն: Այդ և մի շարք ուրիշ ուսումնական կենտրոններ իրենց աղբյուրում ու ավանդներով վարակելի ներգործություն ունեցան դարի երկրորդ կեսի ուսումնական—կրթական օջախների վրա: Դպրոցը և ուսուցիչը դարձան ժողովրդի առաջընթացի, հաճախ նաև նրա գոյատևման հիմնական ուժն ու ապավինը: Նախակրթարաններին փոխարինեցին վարժարանները, իսկ սրանց՝ դպրոցները, տիրացու—վարժապետը դարձավ դասականագող ուսուցիչը, վերջինս՝ մանկավարժ—դաստիարակ և այդ ընթացքի հետ երևան եկավ նաև մանկավարժությունը՝ հանձնելով երախտաշատ այն դեմքերի առանց որոնց անհնար է երևակայել հայաժամը մի ժողովրդի նույնիսկ գոյությունը:

Հեղինակը չի մոռացել կրթական գործի որևէ նշանավոր դեմք, դպրոց, մասնաճյուղային պարբերական: Միայն հիշատակված հատվածում Վ. Երկանյանը խոսում կամ նշում է ավելի քան 80 գործիչի մասին, սեղմ տողերում տալիս նրանց գործունեությունն այդ ասպարեզում, ինչպես և ընդհանուր շարադրանքով ներկայացնում պատմափաստագրական նյութը: Առանձին ենթահատված է նվիրված կրթական գործի կազմակերպմանն ու գրվածքին նպաստող միություններին, կազմակերպություններին ու ընկերություններին, որոնք պետականության բացառականության պայմաններում էական դեր են կատարել: Երկանյանը գնահատություններ էր արձանագործում հասարակության ուղղություն էր տալիս կրթական գործին, միաժամանակ «մերձենում էր դպրոցին և վարժվում կոլեկտիվ ջանքեր կիրառելուն» (էջ 56):

Հարկ է հատուկ նկատել, որ գրքի հեղինակը խիստ ընտրութամբ է օգտագործել և՛ փաստական նյութը, և՛ մտնավանդ թվական տվյալները, որոնք օգնում են ճիշտ պատկերացում կազմելու ժողովրդի գրագիտության և կրթական գործի վիճակի մասին: Երևանի թեմում, նշում է հեղինակը, 1914 թ. գործում էր 185 դպրոց՝ 14 հազար աշակերտով. այդ նահանգում և Կարսի մարզում գոյություն ունեն 400 դպրոց, դր սովորում էին 25 հազարից ավելի աշակերտ, բայց միայն 16 հազար հայ: Դա, սակայն, ինչպես նշվում է, չի նշանակում թե ժողովրդական կրթության գործը ինչ որ չափով բարվոք վիճակում էր. Երևանի նահանգում դարավերջին ժողովրդի

միայն 6,4%-ն էր գրադեռ, 1908 թ. դպրոց էր հաճախում դպրոցահասակ երեխաների լոկ 38,4%-ը:

Այսպիսով, զրբի այս հատվածը ամփոփ գաղափար է տալիս լուսավորության ընդհանուր դրվածքի մասին՝ քննվող ժամանակահատվածում: Նույնը կարելի է ասել «Գրատարությունը և պարբերական մամուլը», «Գիտությունը», «Գրականությունը», «Արվեստը» բաժինների մասին:

Գրքի առանձին հատվածները, իհարկե, կարող էին ավելի ընդարձակ լինել, թերևս հարկ էր այլևայլ փաստեր ևս ներառել՝ հավասարաթեք արդեն նշվածներին: Մասնավորապես կարելի էր ընդարձակել մշակութային մի շարք դեմքերի (Յիզեկա Պողոս, Ան. Փափազյան, Մսերյաններ, Պատկանյաններ, Կ. Փանոսյան, Ս. Լիսիցյան, Ար. Հովհաննիսյան և ուրիշներ) նվիրված տողերը, ավելին ասել որոշ հեղինակների ու գործիչների (Հ. Մյուհաննիսյան, Տ. Նազարյան, Գ. Զիլինկիրյան, Հ. Սըվաճյան, Գ. Արծրունի, Ա. Արասխանյան, Օրբելներ, Մ. Մամուրյան, Ա. Արտիարյան և ուրիշներ) մասին՝ մասնավորապես նկատի ունենալով նրանց հարակից գործունեությունը: Նույնիսկ հարկ էր ներառել «մոռացված», բայց մշակույթի ասպարեզում նրախոյն ունեցող այնպիսի գործիչների, որպիսիքն էին Խ. Պարտիզպանյանը, Կ. Շահնազարյանը, Գ. Այվազովսկին, Ն. Աշտարակեցին, Մ. Արեղյանը, առավել ևս Աթաբեկյանները, Գր. Տեր-Մելիքսեղեկյանը, Տեսեյանները, Վ. Զարդարյանը և էլի շատերը: Մշակույթի առանձին ասպարեզների նվիրված հատվածները, ասենք թարգմանական գրականության և հրապարակախոսության բաժինները, հարկ էր անհրաժեշտաբար ավելի լայն ներկայացնել:

Այս բնույթի այլ ցանկություններ ևս կարելի է հայտնել: Գուցե տեղին կլինի ուշադրություն հրավիրել որոշ ձևակերպումների ճշտման, մի քանի փաստերի վերստին ստուգման վրա: Բայց դրանցից ավելի ուզում ենք փափագ հայտնել, որ Վ. Երկանյանը շարունակի ուսումնասիրել հայ մշակույթի իր ընտրած դարահատվածի պատմությունը՝ այն ընդարձակելով, խորացնելով ու հարստացնելով նոր փաստերով և էջերով: Որպես օրինակ կարող ենք նշել Զմյուռնիայի Մեսրոպյան վարժարանը՝ Հեղինակը նշում է Նուս հիմնվելու տարեթիվը, ակադեմիկոս մանկավարժներին, բնութագրում իբրև արևմտահայ ամենանշանավոր և ամենականոնավոր դպրոցի: Այս դեպքում թերևս դա բավարար է, բայց հետագա ուսումնասիրության ընթացքում անհրաժեշտաբար երևան կգան այդ վարժարանի ավելի քան 120 տարիների (1799—1922) գործունեության շատ նշանակալի էջերը կամ՝ հարկ կլինի էջեր նվիրել Սյունյաց մշակութային ընկերությանը, Վասպուրական թատրոնին, Հայ ընթերցատանը, Սարգիս Վանանդեցուն, Հայրապետ Սավալանյանին և էլի մի շարք գործիչների, հիշատակել նաև գաղթօջախի (ինչու չէ, նաև մյուս բնակավայրերի) բարերարների դերի մասին մշակութային ձեռնարկներում, որ հազիվ թե կարելի է անտեսել:

Մի փափագ ևս. հայ մշակույթի պատմությանը նվիրված հանգամանալի ուսումնասիրության ընթացքում հեղինակը կարծում ենք հատուկ ուշադրություն կդարձնի այն բազմաբնույթ (նաև դասակարգային առումով) պայքարին, որ մշտապես տեղի է ունեցել նաև մշակույթի բնագավառում և որից չի խուսափել որևէ ասպարեզ: Հեղինակը հիշատակված մենագրությունը և գրախոսվող գործի մի շարք էջեր ցույց են տալիս, որ այս պայքարի գլխավոր դրսևորումների պատմությունը նա կարող է ներկայացնել ընդհանուր համապատկերում:

Ողջունելով «Հայկական մշակույթը 1800—1917 թթ.» աշխատությունը, ցանկանք, որ Վ. Երկանյանը շարունակի իր շնորհակալ գործը և ավելի լայն ու հանդամանալի ներկայացնի այդ մեծ թեման հայ, ինչպես և ռուս ընթերցողին:

ՄԻՔԱՅԵԼ ԼԱՍՈՐԱՆ

Պատմական գիտությունների թեկնածու